

AMOS

Hahemaoro bese idau-idau latadiai

¹ Amos, Tekoa mamoe iregudia taudia ta, ena hereva, Israel dainai e ita gaudia herevadia, Usia, Iuda pavapavana, bona Ieroboam loasa, Israel pavapavana, edia nega ai, lağani rua dounu mimia ema bona tano-laga e kau negana ai.

² Ia eto:

Iehova na Siona amo e lolomu,
 Ierusalem amo e herevamu;
 mamoe iregudia taudia edia rei gabudia na e kako-
 romu,
 Karamele ororona dorina na e maraimu.

³ Iehova ini e gwau tomamu:

Damasko ena kerere toi bona hani daidiae,
 lau ese ena dika davana ihenina basina
 gwaua tao;
 badina be idia ese Gilead vada e kwadia, uit na
 heto,
 edia kwadikwadi gaudia na auri gaudia.

⁴ Taunabunai lau ese lahi ta baina siaia Hasaele
 ena ruma latanai,
 una lahi ese Ben-hadad ena gabu aukadia
 baine aradia ore.

⁵ Damasko ena ikoukou auridia baina hakwaidu-
 dia,
 Avene Kourana inoholaina taudia na baina
 negedia daure,
 bona dagi auna e dogoa taomu tauna na Bet eden
 amo baina abia oho,

bona Suria taudia na dauhai baina hanohodia,
Kiri tanona ai.
Iehova na e herevamu.

6 Iehova ini e gwau tomamu:

Gasa ena kerere toi bona hani daidiae,
lau ese ena dika davana ihenina basina
gwaua tao;
badina be idia ese bese ta taunimanimadia
iboudiai na dauhai vada e hanohodia,
Edom imana ai bae atodia helaooreana.

7 Taunabunai lau ese lahi ta baina siaia, Gasa
mağuna latanai,
una lahi ese ena gabu aukadia baine aradia
ore.

8 Asdod inoholaina taudia na baina negedia
daure,
bona dagi auna e dogoa taomu tauna na
Askelono amo baina abia oho;

imagu baina pala henia Ekron ihadikana,
bona Filistia kwabukwabudia na bae mase
ore.

Ğaubada Iehova na e herevamu.

9 Iehova ini e gwau tomamu:

Turo ena kerere toi bona hani daidiae,
lau ese ena dika davana ihenina basina
gwaua tao;
badina be idia ese bese ta taunimanimadia
iboudiai na Edom imana ai e atodia,
bona asie laloa tao, tadikaka vada e heg-
wauhamata heheni.

10 Taunabunai lau ese lahi ta baina siaia, Turo
mağuna latanai,
una lahi ese ena gabu aukadia baine aradia
ore.

11 Iehova ini e gwau tomamu:

Edom ena kerere toi bona hani daidiae,
 lau ese ena dika davana ihenina basina
 gwaua tao;
 badina be ia ese tadina na dare amo e hahavaia,
 bona hebogahisi e negea vaitani;
 ena badu na e siahu loulou,
 ena badu ġaraġara na e dogoa tao hanaihanai.

12 Taunabunai lau ese lahi ta baina siaia, Teman
 latanai,
 una lahi ese Bosra ena gabu aukadia baine
 aradia ore.

13 Iehova ini e gwau tomamu:

Amono taudia edia kerere toi bona hani
 daidiae,
 lau ese edia dika davana ihenina basina
 gwaua tao;
 badina be idia ese rogorogo hahinedia vada e
 dapadia parara Gilead ai,
 edia tano hetoana bae habadaia totona.

14 Taunabunai, lau ese lahi ta baina ha-araia Raba
 maġuna ai,
 una lahi ese ena gabu aukadia baine aradia
 ore,
 mai lolona ida tuari dinana ai,
 mai lai gubana ida koe-hirihi dinana ai;
15 edia pavapava na dauhai bae hanohoa,
 ia bona ena lohia taudia danu ia ida.
 Iehova na e herevamu.

2

1 Iehova ini e gwau tomamu:

Moab ena kerere toi bona hani daidiae,

lau ese ena dika davana ihenina basina
 gwaua tao;
 badina be ia ese Edom pavapavana turiana e
 gabudia,
 ahu ai e halaodia.
² Taunabunai lau ese lahi ta baina siaia Moab
 latanai,
 una lahi ese Kerioto ena gabu aukadia baine
 aradia ore;
 bena Moab na heloḡo-heloḡo ai baine mase,
 lolo bona kibi reḡedia bogaragidiai.
³ Lau ese pavapava na ia bogaragina amo baina
 negea daure,
 bona ena lohia iboudiai na ia ida baina aladia
 mase.
 Iehova na e herevamu.

⁴ Iehova ini e gwau tomamu:
 Iuda ena kerere toi bona hani daidiae,
 lau ese ena dika davana ihenina basina
 gwaua tao;
 badina be idia ese Iehova ena taravatu vada e
 dadaraia,
 bona ena hahedua herevadia asie badinadie;
 a tamadia ese e rakalaidia daladia koikoidia ese
 idia vada e hakaudia kerere.
⁵ Taunabunai lau ese lahi ta baina siaia Iuda la-
 tanai,
 una lahi ese Ierusalem ena gabu aukadia
 baine aradia ore.

Hahemaoro Israel latanai

⁶ Iehova ini e gwau tomamu:
 Israel ena kerere toi bona hani daidiae,
 lau ese ena dika davana ihenina basina
 gwaua tao;

badina be idia ese kara maoromaoro tauna e
 hoiamu, *silver* davana,
 bona e dabumu tauna e hoiamu, tamaka rua
 davadia.

⁷ Idia ese ogōami tauna kwarana na tano gahuna
 ai e moimoilaiamu,
 bona e hisihisimu tauna ena dala e laoa
 ahumu.

Tau ta bona tamana ese hane-ulato tamona deke-
 nai e raka vareaimu,
 unu amo lau ladagu helāgana e hamiroamu.

⁸ Idia ese ihaboulaina patadia iboudiai badiba-
 didiai e hekuremu,
 henitao dabuadiah latadiai.

Edia Dirava ena dubu ai vine ranuna e inuamu,
 hahemaoro ai haida edia amo e abia āgauna.

⁹ Ğau tamona, lau ese Amoro tauna na habuaia tari
 idia vairadiai;
 ena lata na sida audia edia lata heğereğeredia,
 bona ena goada na *oak* audia edia goada
 heğereğeredia.

Ia huahuana na habuaia tari atai ai,
 bona ramuna danu henu ai.

¹⁰ Ina danu, lau ese Aigupto tanona amo na hakau-
 mui lasi,
 lağani hari-ahui lalodiai tano ġaġaena ai na
 hakaumui lao,
 Amoro tauna ena tano ba ġaunaia totona.

¹¹ Natumui haida na haginidia, peroveta taudia ai
 baela,
 bona emui eregabe taudia haida na abidia,
 Nasiri oreana taudia ai baela.
 Israel taumui e, una na momokani ani?
 Iehova na e herevamu.

- 12** A umui ese Nasiri oreana taudia na vine ranuna
 amo o ha-inudia,
 bona peroveta taudia na o haḡanidia, oto
 “Umui na basio peroveta”.
- 13** A itaia, lau ese emui gabu ai baina taomui tari,
 uit iḡuidia ai e honumu reruena e hetao tarimu
 na heto.
- 14** Ae-haraḡa tauna na basine heau diba,
 goadaa tauna ese ena goada basine dogoa tao,
 bona tuari tauna basine roho mauri.
- 15** Peva tauna basine gini,
 ae-haraga tauna na sibona basine
 hahemauri,
 bona hosi-gui tauna basine roho mauri.
- 16** Lalo-auka tauna tuari taudia bogaragidiai na
 ḡaḡaena ai baine heau una dina ai.
 Iehova na e herevamu.

3

Peroveta tauna ena ḡaukara

- 1** Israel taumui e, ina hereva, Iehova ese umui latamui ai, Aigupto tanona amo na hakaua lasi besena idoinai latanai, vada e gwauraia herevana vada ba kamonai.
- 2** Tanobada besedia iboudiai bogaragidia amo
 umui sibomui vada na dibamui;
 taunabunai lau ese matamui baina hakani,
 emui kara havara iboudiai daidiae.
- 3** Tatau rarua basiema henega bou guna,
 idia bema raka hebou diba a?
- 4** Leona na asi damuna negana ai
 uda ai e ḡoumu a?

Leona natuna ese āgau ta se abiamu negana ai
ena kohua lalonai e taimu a?

⁵ Idoa se miamu gabuna ai
manu ta e heidoamu a?

Āgau ta se heidoa negana ai
idoa na e hepiu isimu a?

⁶ Kibi na hanua ta ai e hiririamu negana ai
taunimanima basie gari a?

Iehova ese se hadikaiamu negana ai
dika na hanua ta ai e kaum a?

⁷ Momokani Āgaubada Iehova ese kara ta se karaia
hehunimu,
a peroveta taudia, ena hesiai taudia, na e
hadibalaidia gunamu.

⁸ Leona vada e āgou,
daika basine gari?

Āgaubada Iehova vada e hereva;
daika basine peroveta?

Samaria irevana

⁹ Asuria ena gabu aukadia ba hamaorodia,
bona Aigupto tanona ena gabu aukadia danu;
baoto: Samaria ororodia latadiiai ba hahebou,
helōgo-ahuahu badadia ia lalonai ba itadia,
bona hahehisu karadia ia bogaraginai danu.

¹⁰ Iehova na e tomu: Kara maoromaoro ikaradia
na asi dibadia;
idia ese dağedağe bona dadidadi karadia na
edia gabu aukadia ai e hegaaegaelaidiamu.

¹¹ Taunabunai Āgaubada Iehova ini e gwau tomamu;
mai tauna ta ese tano baine koua hegege,
emui mağu baine āgigidia dobi,
bona emui gabu aukadia kohudia baine dadi
ore.

12 Iehova ini e gwau tomamu: Mamoe ireḡudia tauna ese leona uduna amo mamoe aena rua eiava taiana kahana baine rauadia na heto, Israel taudia Samaria ai e nohomu na unu bae rauadia toma, mai hekure patana daigunina ta eiava mahuta ġauna kahana ta ida.

13 Ġaubada Iehova, Iehova Sabaota, ini e gwau tomamu:

A kamonai, bona Iakob iduhuna latanai hahebade herevadia ba gwaurai, baoto,

14 Israel na ena kara havara daidiae matana baina hakania dinana ai,
lau ese Betele ena ihaboulaina patadia lata-diae

mata-hakani karadia baina kara;
benia ihaboulaina patana doadia bae heutu oho,
tano ai bae moru.

15 Keru negana rumana bona siahu negana ru-mana na baina huaridia,

bona aivori* rumadia na bae heḡīgi dobi,
bona ruma badadia na bae ore vaitani.
Iehova na e herevamu.

4

1 Basan boromakau hahinedia e, ina hereva ba kamonai,

Samaria ororona ai o nohomu hahinemui e;
umui ese ogogami taudia na o hahisidiamu,
bona e dabumu taudia na o taodia tarimu;
adavamui o hamaorodiamu, o tomu
“A mailaia, baia inua”.

2 Ġaubada Iehova na ena helaġa bagunai vada e gwau hamata,
e tomu: Nega na emui ai baine kau,

* **3:15** “Aivori” na elefant doadia.

igau amo bae verimui oho,
 kimai amo bae abimui ore;
 3 bena māgu maurudia amo do ba rau lasi,
 ta ta vairana vairana amo baola;
 bae negemui daure Haramono ai.
 Iehova na e herevamu.

Israel na se helalomu

4 Betele baoma, ba kara kerere,
 Gilgal baoma, emui kerere ba hahohodia;
 daba iboudiai emui boubou ġaudia ba mailaidia,
 dina toi toi amo emui ġau karoadia ihagwau-
 tadia danu.
 5 Israel taumui e, e hatubua flaoana ba hahela-
 gaia,
 emui hahenamo bouboudia;
 ura-kwalimu herahiadia ba gwauraidia,
 ba gwauraidia hedinarai;
 badina be emui ura korikori bunai.
 Gaubada Iehova na e herevamu.

6 Ise ġoevaġoева na henimui, emui hanua iboudiai
 lalodiae,
 doe danu na henimui, emui gabu iboudiai
 lalodiae;
 ġau tamona umui na dekegu asio lou mai.
 Iehova na e herevamu.

7 Taboro negana na do hua toi vairai,
 lau ese medu na emui ai na rua.
 Medu na hanua ta latanai na hadihoa,
 bona ma hanua ta latanai asina hadihoa;
 uma ta na medu ese e hapariparia,
 ma uma ta na e kaukau, medu na ia latanai se
 diho dainai.
 8 Bena hanua rua eiava toi taudia ese

hanua ta e lao heniava, ranu bae inua totona,
a gadodia asie doro;
gau tamona umui na dekegu asio lou mai.

Iehova na e herevamu.

⁹ Hogohogo bona valavala amo na hadikamui,
emui uma bona emui vine imeadia na
havahudia;
emui suke audia bona emui olive audia na kwadi
ese e ani ore;
gau tamona umui na dekegu asio lou mai.
Iehova na e herevamu.

¹⁰ Dai-hanai gorerena na bogaragimui ai na siaia
vasi,

Aigupto ai na karava na heto;
emui eregabe taudia na dare amo na aladia mase,
emui hosi na na abidia oho dauhai,
bona emui taruha bodagana na udu-
baubaumui ai na hadaea;
gau tamona umui na dekegu asio lou mai.

Iehova na e herevamu.

¹¹ Lau ese umui haida na hadareremui,
Dirava ese Sodoma bona Gomora e hadarere-
dia na heto;
umui na lahi tutuna lahi lalona amo e veria lasimu
na heto;
gau tamona umui na dekegu asio lou mai.
Iehova na e herevamu.

¹² Taunabunai, Israel e, ini baina karamui toma;
bena ini baina karamui toma dainai,
Israel e, ba heḡaeḡae,
emui Dirava ida do ba hedavari.

¹³ A itaia, ororo e karadiamu

bona lai e havaradiamu Diravana,
 ena lalo-hadai na taunimanima e hadibalaidiamu
 Diravana,
 daba e hadiburaiamu bona tanobada ena atai
 gabudia e moimoilaidiamu Diravana,
 Iehova, Iehova Sabaota,
 ia ladana bunai.

5

Israel e, ba helalo

- ¹ Israel besena e, egu rohe-ahu herevana oi latamu ai vada ba kamonai.
² Israel hane-ulatona vada e moru,
 ia na basine tore isi lou;
 ena tano ai vada e rakatania,
 ta ese basine hatorea isi.
- ³ Badina be Ģaubada Iehova ini e gwau tomamu:
 Hanua ta amo daha-ta e raka lasimu,
 a sinahu tamona bae mauri;
 ma hanua ta amo sinahu-ta e raka lasimu,
 a gwauta mo bae mauri,
 Israel besena enai.
- ⁴ Badina be Iehova ese Israel besena e hereva
 heniamu,
 ini e gwau tomamu:
 Lau ba tahugu, bena ba mauri.
- ⁵ Betele basio tahu,
 Gilgal ai basio raka vareai,
 Bere-sieba ai basio raka hanai;
 badina be Gilgal na dauhai bae hanohoa,
 bona Betele na baine baia.
- ⁶ Iehova ba tahu, bena ba mauri;
 ia na lahi na heto baine ara, Iosef ena rumai,

- baine ara ore, ta basine habodoa diba Betele
 ai, na garina;
- ⁷ umui, hahemaoro ūgoevaōgoeva na muramura iditanai
 ai vada o halaoa
 bona kara maoromaoro tanobada ai vada o
 tilhoa dobi taumui!
- ⁸ Ia ese Kima bona Kesili* e karadia,
 hanuaboi diburana na daba ai e halaoamu,
 bona dina na e hadiburaimu, hanuaboi ai e
 halaoamu;
 ia ese davara ranudia e boiridiamu,
 bona tanobada kopina ai e bubudia dobimu;
 ia ladana na Iehova.
- ⁹ Ia ese goada taudia e aladia oremu,
 bona kohoro aukadia e habuadia tarimu.
- ¹⁰ Hahemaoro gabuna ai sisiba herevadia e gwauraimu tauna na
 idia ese e inai heniamu,
 bona hereva momokanidia e gwauraimu tauna na
 idia ese e inai henia badamu.
- ¹¹ Taunabunai, badina be ogoāami tauna vada o
 moia tao
 bona ena uit momo vada o dadia dainai,
 nadi rumadia vada o haginidia,
 to lalodai basio noho,
 bona vine imeadia namodia vada o hado,
 to edia vine ranudia basio inu.
- ¹² Badina be lau dibagu emui kerere na momo,
 bona emui kara dika na bada herea.
 Umui ese kara maoromaoro taudia o hahisidiamu,

* **5:8** “Kima” bona “Kesili” be hisiu haida ladadia, Heberu gado ai.

- bona koikoi henitaona o abiamu,
 bona e dabumu tauna hanua ikoukouna ai na
 hahemaoro gabuna amo o lulua ohomu.
- ¹³ Taunabunai, nega inihetomana ai
 lalo-ihunu tauna na asi reğereğena baine
 noho,
 badina be nega dikana.
- ¹⁴ Namo ba tahua, dika basio tahua,
 ba mauri helaoreana;
 bena Dirava, Iehova Sabaota, ese baine bamomu,
 ema hereva heğereğerenä.
- ¹⁵ Dika ba inai henia, namo ba ura henia,
 hahemaoro ġoevaġgoeva na hanua ikoukouna
 ai ba haginia;
 bena reana Dirava, Iehova Sabaota, ese
 Iosef iduhuna taudia kwabukwabudia baine
 bogadia hisi.
- ¹⁶ Taunabunai Dirava, Iehova Sabaota, Ġaubada,
 na ini e gvvau tomamu:
 Ariara iboudiai lalodiae bae tai lolololo,
 bona hanua ariaradia iboudiai lalodiae baeto
 “Inaio, inaio!”
- Biru taudia bae boiridia, bae taitai,
 bona herohe-ahu mai dibadia taudia bae
 boiridia, bae tai lolololo;
- ¹⁷ vine imeadia iboudiae lalodiae bae tai lolololo,
 badina be bogaragimui amo baina raka
 hanai.
 Iehova na e herevamu.
- ¹⁸ Iehova ena dina o hekise-hekise heniamu tau-
 mui, madi, ihabaimui!
 Dahaka dainai Iehova ena dina o laroamu?

Una dina na dibura, dia diari;
 19 tau ta ese leona bema heautania
 bena bea ta ida bema hedavari na heto;
 eiava rumai lalonai bema raka vareai,
 haba ai bema hetaotao,
 bena gaigai ese bema koria na heto.
 20 Iehova ena dina na dibura, dia diari, ani?
 bona gabora asi diarina ani?

- 21 Emui aria na na inai henidiamu bona na
 dadaraidiamu;
 emui hebou helāgadua asina moalelaidiamu.
- 22 Ena be emui ġole-oho bouboudia bona
 emui flaoa bouboudia ġaudia o harihari
 henigumu,
 to lau ese basina abidia dae;
 bona emui ubu-ubu ġaudia, maino boubou ġaudia
 ai o halaodiamu, na
 lau ese basina haġeredia.
- 23 Emui ane reġedia na egu ai bavabi oho,
 emui gitara reġedia basina hakala henidia.
- 24 A hahemaoro ġoevaġoeva baine aru, abata na
 heto,
 bona kara maoromaoro, se kororomu
 sinavaina na heto.
- 25 Israel besena e, laġani hari-ahui tano ġaġaena
 ai o nohova lalodai boubou bona herahia ġaudia
 na egu ai o mailaidia a?
- 26 Emui pavapava Sakutu, bona emui hisiu di-
 ravana Kaiwana, emui kaivakuku, imamui amo o
 kara gaudia, na do ba huadie;
- 27 taunabunai, lau ese baina laohaimui,
 Damasko unukahanai baina hanohomui. Dirava,
 ladana Iehova Sabaota, na e herevamu.

6*Israel ihabua-tarina*

- ¹ Siona ai e noho namonamomu
 bona Samaria ororona ai asi garidia e no-
 homu taudia,
 bese gini-gunana ena tatau hereadria,
 Israel taudia e lao henidiamu taudia,
 madi, ihabaidia!
- ² Ba raka lao, Kalne baola, ba itaia;
 unu amo Hamat badana baola;
 bena ba hekei diho,
 Gata, Filistia taudia edia hanua, baola.
 Idia ese ini basileia e hereadiamu a?
 Eiava edia tano na bada, emui tano be marāgi,
 a?
- ³ Umui dika dinana o atoa daudaumu
 bona dağedağe ena vara badina o veria
 kahimu taumui,
 na nanadaimuimu.
- ⁴ Aivori patadia ai e hekuremu
 bona edia lağā-ani patadia ai e eno deremu
 taudia,
 mamoe natudia seri amo
 bona boromakau natudia ubu-ubu gabuna
 amo e animu taudia,
 madi, ihabaidia!
- ⁵ Gitara e hataidiamu ai ane kavakavadia e abimu
 bona David na heto hatai-hatai ġaudia idaudia
 e karamu taudia,
 madi, ihabaidia!
- ⁶ Vine ranuna na nau amo e inuamu,
 bona dehoro namo-hereadria amo taudia e
 dahudiamu,
 a Iosef ena dika asie lalo hisihisilaiamu taudia,

madi, ihabaidia!

⁷ Taunabunai dauhai ihanohodia negana ai idia
na bae laohaidia guna,
bona e eno deremu taudia edia moale baine
boio.

⁸ Ģaubada Iehova na sibona ladana ai vada e gwau
hamata;
Dirava, Iehova Sabaota, na e herevamu e
tomu:
Iakob ena heāgi na inai henia badamu,
ena gabu aukadia danu na inai henidiamu;
hanua na baina kahua nege,
bona ia lalona ġaudia iboudiai.

⁹ Tatau gwauta ruma tamona ai bema noho, idia
na bae mase.

¹⁰ Bena mase tauna varavarana, tau-anina
baine hagolea oho tauna, ese baine abia isi, turi-
ana na ruma lalona amo murimuri ai baine laohai
totona, bona ruma laloma kahana ai e nohomu
tauna baine nanadaia, baineto “Tau ta doene
noho eiava?”, bena una tau baine haere, baineto
“Lasi”, negana ai, ia ma baineto “Eremu! Iehova
ladana na basita hatoa”.

¹¹ Badina be, a itaia, Iehova na e haheğanimu,
bena ruma badana na bae huaria patapata,
bona ruma marağina na bae huaria sisisisi.

¹² Hosi be haga nadidia ai e heaumu a?
Davara na boromakau mamaruanedia amo e
ruaiamu a?
A umui ese hahemaoro ġoevaġoeva na mase mura-
murana ai vada o halaoa,
bona kara maoromaoro huahuana na mura-
mura iditana ai vada o halaoa.

¹³ Umui ese Lo-debara o moalelaiamu,
o tomu “Sibomai emai goada ai Karanaimi
vada a abia emai”, ani?

¹⁴ Dirava, Iehova Sabaota, na e tomu:
Israel taumui e,
a itaia, lau ese bese ta baina hatorea isi
umui ihadikamui totona,
bena bae hahisihisimui, Hamat raka-vareaina
amo
ela bona Araba dokana.

7

Mata-hanai toi

¹ Bena Ĝaubada Iehova ese e haheitalaigu, ia ese kwadi e haboudia heḡaeḡaeva, rei matamatana e tubu louva negana ai; una na rei ena tubu iharuana, pavapava ena rei vada e utua murinai.

² Unu kwadi ese tano reina vada e ania ore murinai, lau na hereva, nato:

Gaubada Iehova e, lau na noimumu, ba heboga hisi.
Iakob ede baine gini toma?
Ia na maraḡi herea.

³ Bena Iehova ese e helalolaia kerehai;
Iehova eto “Ina na basine hekara”.

⁴ Taunabunai Ĝaubada Iehova ese e haheita-
laigu, na itaia, Gaubada Iehova ese hahemaoro e
boilaia, lahi ḡauna; bena una lahi ese gadobada e
hakaukauava bona tano e araiava.

⁵ Bena lau nato:
Gaubada Iehova e, lau na noimumu, a doko.
Iakob ede baine gini toma?
Ia na maraḡi herea.

⁶ Bena Iehova ese e helalolaia kerehai;
Gaubada Iehova eto “Ina danu basine hekara”.

7 Ma e haheitalaigu, na itaia, Ģaubada na gini-maoro varona amo e haginia habana badibadinai e gini, mai gini-maoro varona ta imana ai.

8 Bena Iehova ese e hereva henigu, eto, Amos e, dahaka o itaiamu? Lau nato, Gini-maoro varona ta. Bena Ģaubada eto:

A itaia, gini-maoro varona ta

egu bese Israel bogaragidiai na atoamu;
nega ta ai basina lagaudia hanai lou.

9 Isaak ena atai gabudia bae ġāgāe,
Israel ena gabu helāgadie bae vahu;
bona Ieroboam ena iduhu na dare amo baina
tuari henidia.

Amos bona Amasia

10 Bena Amasia, hahelaġa tauna Betele ai, ese gwaukau e siaia, Ieroboam, Israel pavapavana, dekenai, eto, Amos ese oi ihadikamu dalana e karaia hatamu, Israel besena bogaraginai; tano taudia lalodia na asie heġereġere iena hereva iboudiai ihaheaukalaidia ai.

11 Badina be Amos na ini e gwau toma:
Ieroboam na dare amo do baine mase,
bona Israel taudia na edia tano amo bae
abidia oho,
dauhai bae hanohodia.

12 Bena Amasia ese Amos e hamaoroa, eto, Mata-hanai taumu e, aola, Iuda tanona ba heau lao, unuseni ai bavaniani bona ba peroveta;

13 a nega ta ai Betele ai basio peroveta lou, badina be ina na hanua pavapavana ena gabu helāgana bona basileia ena dubu.

14 Bena Amos ese Amasia e haere henia, eto, Lau na dia peroveta tauna, bona dia peroveta tauna

natuna. Lau na mamoe bona sukamore audia iregudia tauna;

¹⁵ bena Iehova ese manoe serina īgavana amo e abigu. Bena Iehova ese e hamaorogu, eto, Aola, egu bese Israel ediai ba peroveta.

¹⁶ Taunabunai, Iehova ena hereva a kamonai.

Oi na o tomu “Israel taudia latadiai basio peroveta

bona Isaak iduhuna taudia latadiai basio haroro”.

¹⁷ Taunabunai Iehova ini e gwau tomamu:

Adavamu na ariara hahinena ai bainela, hanua lalonai;

natumu mamaruanedia bona hahinedia na dare ai bae mase,

bona emu tano na haida ese bae heharilaia; oi na tano dia īgoeva ai ba mase,

bona Israel na momokani edia tano amo bae abidia oho,

dauhai bae hanohodia.

8

Mata-hanai ihahanina

¹ Bena Ģaubada Iehova ese ma e haheitalaigu, au huahua maġedia bosea ta na itaia.

² Bena ia eto, Amos e, dahaka o itaiamu? Bena lau nato, Au huahua maġedia bosea ta. Bena Iehova ese e hereva henigu, eto:

Egu bese Israel vada e maġe, hahebua-tari enai; nega ta ai basina lagaudia hanai lou;

³ dubu anedia na taitai ai bae hahelao una dina ai. Gaubada Iehova na e herevamu.

Mase tau-anidia bae hoho,

gabu iboudiai murimuri ai bae tahodia lasi, asi regereġedia.

Hahedika vada e kahikahi Israel latanai

- ⁴ Umui, e dabumu taudia o moidia taomu
 bona tano ena ogoğami taudia o hamasedi-
 amu taumui,
 ina na a kamonai!
- ⁵ Umui na o hereva hehenimu, o tomu:
 Hua matamata ariana na edena nega ai baine
 ore,
 bena aniani ġaudia baita hoihoilai?
 Bona dina helāga na edena nega ai baine ore,
 bena uit baita hoihoilaia?
 Bena efa baita hamaraġia bona sekele baita
 habadaia,
 bona hahetoho ġaudia koikoidia amo tauni-
 manima baita dibāġanidia;
- ⁶ ogoğami taudia na *silver* amo baita hoidia,
 bona e dabumu taudia na tamaka rua rua
 amo danu;
 bona uit momona danu baita hoihoilaia.
- ⁷ Iakob ena heaġi dainai Iehova vada e gwau
 hamata, eto:
 Momokani edia kara ta basina laloa boio.
- ⁸ Una dainai tano baine heude-heude,
 bona inoholaina taudia iboudiai bae tai,
 idoinai baine dae, Nilo sinavaina na heto,
 baine hegure-hegure, bena ma baiule diho,
 Nilo, Aigupto sinavaina, na heto, ani?
- ⁹ Ĝaubada Iehova na e tomu: Una dina ai
 dina tubua ai dina baina hadihoa,
 bona dina diarina ai tanobada baina hadibu-
 raia.
- ¹⁰ Emui aria na taitai ai baina halaodia,
 bona emui ane iboudiai na rohe-ahu ai baina
 halaodia.

Koekoe iboudiai na puse dabuadia baina hario-laidia,
 bona kwara iboudiai baina naudia.
 Vara-edea merona itailaina heğereğerena ai baina halaoa,
 bona dokona na dina iditana heğereğerena ai.

- 11** Ġaubada Iehova na e tomu.
 A itaia, nega na e maimu,
 doe na tano latanai baina siaia.
 Dia aniani ai eiava ranu ai basie dabu,
 a Iehova ena hereva ikamonaidia ai hari.
- 12** Davara ta konena ela bona ma davara ta konena
 bae loa eva-eva,
 mirigini kahana amo ela bona laurabada
 danu;
 bae heau lao heau mai, Iehova ena hereva
 itahuna,
 to basie davaria.
- 13** Una dina ai hane-ulato rami-hebou namo-heredadia bona uhau na
 bae ranu mase, bae manori.
- 14** Asima, Samaria diravana, ladana ai e gwau
 hamatamu taudia
 e tomu “Dan e, emu dirava e maurimu
 heğereğerena”,
 bona “Bere-sieba dalana e maurimu
 heğereğerena”;
 idia na bae keto,
 bona nega ta ai basie tore isi lou.

1 Ĝaubada na itaia, ihaboulaina patana badibadini e gini,
e hereva, eto:

Au-tubua kwaradia ikorodla ba botadia,
ela bona badidia bae heude-heude;
ba huaridia patapata,
bena taunimanima iboudiai kwaradia ai bae
heğīgi kau.

Bena oredia na dare amo baina aladia mase,
ta basine heau oho,
ta basine roho mauri.

2 Ena be guri bae ġei ela bona Mase Gabuna,
to unu amo lau imagu ese baine abidia;
ena be guba ai bae dara dae,
to unu amo baina veridia dobi.

3 Ena be Karamele ororona dorina ai bae komu,
to unuseni ai baina tahudia ela bona baina
abidia;
ena be davara ena dobu gabudia ai lau vairagu
amo bae komu,
to unuseni ai dagwala baina haganidia, bena
baine koridia.

4 Ena be inaidia ese bae guidia, bena bae doridia
lao,
to unuseni ai dare baina hagania, bena baine
aladia mase.

Baina raraidia tao,
dia ihanamodia to ihadikadia totona.

5 Ĝaubada, Iehova Sabaota, ese
tanobada e dawa tohomu, bena e veve ohomu,
bona inoholaina taudia na e taitaimu;
idoinai e daemu, Nilo sinavaina na heto,

ma e dihomu, Nilo, Aigupto sinavaina, na heto.

⁶ Ia ese ena atai daiutudia e hadaidiamu guba ai,
bona ena henu daiutudia tanobada ai;
ia ese davara ranudia e boilaidiamu,
bona tanobada kopina ai e bubudia dobimu;
ia ladana na Iehova.

⁷ Iehova na e tomu: Israel taumui e,
umui na dia Etiopia taudia heğereğeredia
lauegu ai a?

Israel taudia na Aigupto tanona amo asina hakau-
dia lasi a?
Filistia taudia na Kaftoro amo bona Suria tau-
dia na Kiri amo asina mailaidia a?

⁸ A itaia, Čaubada Iehova ese
kara dika basileiana na e raraia taomu.
Iehova na e tomu: tano kopina amo baina habuaia
tari;
ḡau tamona, Iakob ena iduhu basina habuaia
tari vaitani.

Israel baine namo lou

⁹ A itaia, lau na baina haheğani,
Israel besena baina haruiruia, basileia
iboudiai bogaragidiae,
ruirui ḡauna amo bama ruiruia na heto,
a nadinadi ta na tano ai basine moru.

¹⁰ Kara dika taudia egu bese bogaraginai iboudiai,
e tomu “Dika ese basine lasida tao eiava ba-
sine hedavari henida” taudia,
na dare ai bae mase.

¹¹ Una dina ai David ena kalaga, e heğigi dobi
ḡauna,
lau ese ma baina haginia lou;

- e mauru gabudia baina banidia,
 e heğigi dobi gabudia baina haginidia,
 baina haginia lou,
 nega gunadia heğereğeredia ai!
- ¹² Edom orena bae ġaunaia helaoreana,
 bona lau ladagu e henemailai besedia
 iboudiai danu.
- Iehova, ini kara e karamu Diravana,
 na e herevamu.
- ¹³ Iehova na e tomu: A itaia, nega na e maimu,
 ruarua tauna ese uit iutuna tauna baine lasia
 tao,
 bona vine huahuadia imoimoilaidia tauna
 ese hadohado tauna baine lasia tao;
 ororo amo vine ranuna gaihona baine hetuturu,
 bona ororo komutadia amo baine aru.
- ¹⁴ Egu besse Israel taudia baina hanamodia lou,
 e heğigi dobi hanuadia bae haginidia lou,
 bena bae noholaidia;
 vine imeadria bae hado, bena edia vine ranuna bae
 inua,
 uma bae kara, bena anidria bae ani.
- ¹⁵ Edia tano ai baina hanohodia,
 bona vada na henidria tanona amo
 idia na nega ta ai basie heabi oho lou.
- Iehova, emui Dirava, na e herevamu.

**Buk Baibel long tokples Motu
The Holy Bible in the Motu language of Papua New
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca